

— 7 —

## CAP. II.

### *De personis colloquentibus Lycino et Hermotimo.*

Eadem simplicitate qua dialogi titulus commendatur, scena et actores placent. In via urbis eiusdem unus interlocutorum isque primarum actor, nomine Lycinus, forte incidit in alterum qui Hermotimus vocatur, virum iam sexagenarium ad scholas philosophiae doctoris iturum. Ubi quum colloquium de fine et fructu sapientiae studii exorsi essent, Lycinus Hermotimum ad scholas properantem allato nuntio de feriis ob hesternam magistri crapulam indictis remoratur, tum multitudine atque gravitate rationum hic et hic captiosarum eo perducit, ut philosophorum sectator omnem philosophiam continuo abicere animum inducat. Iam in his personis, quae solae omnes dialogi partes sustinent, videamus quid verum quid fictum habendum sit. Neque enim Luciani personae in universum ficticiae aut nihil significantes habenda sunt, ut multis visum est, nec quovis nomine certus quidam Luciani aequalium denotatur aut perficitur.

Primum quod ad Lycini nomen attinet, etsi ubique apud Lucianum invenitur, haud facile quenquam fugiet, Lucianum sub eo latere, tamen nemo adhuc quod quidem sciam per frequentem huius nominis usum et propinquam eius cum gentilicio Luciani nomine cognationem indagandam suscepit, quamquam Lehmannus (t. I. praef. p. 20), Hermannus (de conscr. hist. p. 140), Jacobitzius (in indice) haec duo nomina non differre affirmarunt. Ceterorum nominum, quibus Lucianus in aliis dialogis se induit, usus tam parvus est, ut idem vix bis terve repetitum inveniamus. Sic Menippi Cynici illius et satrici nomen (cf. pisc. 26) tantum in dialogis mortuorum et in Menippo ad partes suas agendas usurpavit, quo eodem tamen nomine cum Icaro compositum ad alterum interlocutorem designandum usus est in Icaromenippo. Item sutoris sapientis Micylli personam non dignatus est in Gallo et in Tyranno. Sub Tychiade\*), quod nomen unde assumpserit non liquet, in philopseude et parasito ipse latet. Frequentius semet ipsum simpliciter nomine ἔταιρος inducit, quo eodem vocabulo aut fictis nominibus propriis idem significantibus ut Pamphilo, Philone aut Philonide etiam alterum interlocutorem appellare solet. Sed neque hanc appellationem neque ipsum verum

---

\* Hoc nomen, cuius etsi multa cognata et ex eadem radice orta et in libris et in inscriptionibus inveniuntur, nullum usquam vestigium deprehendere potui, a Luciano verborum lusus amanti eodem modo fictum videtur, quo Pisc. 19 coram iudicibus se Parthesiaden, Alexionis filium nuncupavit et Gall. 14 ex Simone Simonidem fecit (cf. fugitiv. 26). Significat autem hoc patronymicum, sive a dea fortunae (*Tύχη*) sive a deo *Tύχει*, cuius in Anthologia mentio sit, derivatur, fortunae filium i. e. hominem fortunam fastricem expertum, quem Lucianus sibi in vita anteacta praecipue in Gallia obtigisse gloriat (cf. somnium; pro merc. cond. 15). Itaque non immerito cum festivitate quadam se nonnquam Tychiaden et habuisse et appellasse videtur.

nomen Luciani, cuius loco etiam Σύρον vel Σύρον λογογράφον (bis acc. 25) vel Σύρον ἄγητορα (bis acc. 14) se nuncupavit, toties adhibuit, quoties Lycino partes suas attribuit. Praeter Hermotimum enim in undecim libellis Lycinus Luciani vices sustinet, qui sunt Disputatio cum Hesiodo, Eunuchus, Symposium, Navigium, Imagines, pro Imaginibus, Amores, de saltatione, Cynicus, Lexiphanes, Soloecista, quorum in numero etsi non omnes, at certe nonnulli eorum quos Bekkerus damnavit Luciano abiudicandi sunt, etiam perfectiores et nondum in suspicionem vocati dialogi inveniuntur, ut Hermotimus, Eunuchus, Navigium, Symposium. Hoc tam frequenti usu eiusdem nominis non solum docemur Lycinum non eodem loco habendum quo cetera facta nomina sub quibus Lucianus latet, sed etiam tam prope ad Luciani nomen accedere, ut dubitari possit, utrum Lycinus potius an Lucianus verum scriptoris nomen fuerit, quod revera scholiastae videtur accidisse (cf. edit. Jacobitz. t. IV. p. 118 sq.). Verum ex accuriori nominum ipsorum disquisitione certisque testimoniis intellexisse mihi videor, hunc nostrum scriptorem a patribus nomen Luciani accepisse neque unquam plane abiecissem, sed quum inter Graecos versaretur, apud quos in civium numerum se relatum esse memorat (bis acc. 30), Lycinum potius appellatum fuisse (cf. Symposium c. 11, ubi narrat se ab uno convivarum Lycinum vocatum esse). Patrium enim sive gentilicium nomen Lucianum fuisse, ipse diserte declarat Alex. 55, ubi suum cum illo sibi infestissimo praestigiatore tunc in Paphlagonia versanti congressum memorans dicit se illi nomine Luciani notum fuisse. Atque hoc nomen quo Lucianum apud barbaros potissimum vocatum fuisse veri simile est, illo tempore et postea in illis regionibus neque infrequens neque obscurum fuisse ex catalogo scriptorum apud Fabricium (bibl. graec. t. V. p. 361 sqq.) colligere licet, ubi inter decem Lucianos et in sacris et in profanis litteris haud ignobiles etiam unus Samosatensis nostri scriptoris popularis (cf. de hist. conser. 25.), alius Antiochenus nominatur. Si vero nominis originem familiaeque huius nostri Luciani mediocrem conditionem, qualem ipse in somnio depinxit, spectaveris, veri perquam simile est hoc nomen nescio quo tempore ductum a Lucio quodam romano, cuius libertus domini nomen mutata terminatione in anus acceperit (cf. Pape lexic. nom. propr. praef. p. 11). Sed nec nominis nec generis ignobiliscaussa fuit, cur in nomine a parentibus accepto (cf. Beckeri Charicles I. p. 25) non acqueverit, quando originem barbarem et obscuram gloria ingenii et eloquentiae vere Atticae nobilitasse se identidem praedicat (cf. Somnium, Bis acc.). Quod Lycinum se appellari maluit, quum proiectiori aetate plurimum inter Graecos idque Athenis vitam degeret et Atticorum ἀττικώτατος esset, tantum propter peregrinum illud et barbarum, quod in romano nomine graecas aures offendebat, factum videtur. Quam ob caussam Lycini nomen quod graecae originis et suo cognatissimum et inde ab Aristophane in libris et inscriptionibus frequens esset, aut ipse sibi indidit aut a Graecis sibi inditum recepit. Scilicet ut Lucianus in Lycinum transformaretur, primum loco Romanorum vocalis ū graecum ū adhibendum erat quod in latinis nominibus apud grecos scribentes usitatissimum fuisse constat; tum contractio nominis

ceteroquin Graecis in nominibus propriis familiaris eo facilior fuit, quod graeci poetae syllabam penultimam in istius modi derivatis Romanorum nominibus corripere solebant. Cf. Luciani epigr. I. ed. Jacobitz. IV. pag. 21; epigr. 18. ed. Bekker. tom. II. p. 446; Passow. lex. ed. 4. tab. prosod. VI; Lobeck. ad Phryn. p. 670; Welcker opusc. I. p. 167; Hermann Antiq. gr. priv. III, §. 32, 17, 18, 19. Cuius simile exemplum offert cognatum nomen Lucae evangelistae quod correptum habetur ex Lucano, ut Silas ex Silano. Cf. H. Steph. thes. s. v. Lucas.

Quam proclives autem Lucianus eiusque aequales ad nomina propria multifariam variis de caassis mutanda fuerint, paucis quae quidem apud Lucianum adhuc invenerim exemplis confirmare a re non alienum erit. Sic Peregrinus gaudebat se appellare Proteum (cf. Peregr. 1). Item sophista ille et grammaticus, quem Lucianus in *Rhet. praceptor* castigavit, quum antequam fama floreret *Πλοθειρος* appellaretur, postea nomen *Πολυδεικης* se accepisse narrat (cf. rhet. praec. 24), quo eundem significari cui apud Romanos Pollucis nomen fuit speciosis argumentis Rankeus demonstrare conatus est (cf. Ranke, Pollux et Lucianus). In Pseudologista (c. 27) Timarchus quidam nequissimus homo, cuius nomen Bekkerus in titulo omittere non debuit, una littera praefixa ab Atheniensibus ad infamiam notandam Atimarchus appellatus est. Contra ad augendam amplitudinem pauperis sutoris Simonis, postquam hereditate patruelis accepta dives factus est, mutatur in Simoniden (cf. Gall. 14). Quin etiam prorsus nova et magnifice sonantia nomina homines e servis divites facti accipiebant (cf. Timon. 22 ibique Hemsterhusius). Quem quidem morem mutandorum nominum ut Lucianus in vita privata et ad risum iocumque movendum probavit et amavit, ita eum damnandum et vitandum iudicavit, si scriptores quidam falso atticismi studio inducti in veris historiis scribendis nomina latina in graeca mutantes sibi dissimilia redderent, veluti si Saturnium *Κρόνιον*, Frontonem *Φρόντιν*, Titianum *Τιτάνιον* appellarent. Quod etsi summo iure ubi de fide historiae agitur statuit, tamen ipse non dubitavit, Romanorum Saturnalia appellare *Κρόνια* (cf. Merc. cond. 37) et Saturnales epistolas dicere *Κρονικές ἐπιστολάς*, sicut l. l. in locum romani festi Mineruae quinquatuum substituit Atheniensium *Παναθήναια*. Haec pauca quae attuli exempla satis luculenter, opinor, declarant Lucianum et suo et temporis sui ingenio induluisse non solum graeca nomina ut res postulabat mutantem, sed etiam romanis notiones ad Graecorum consuetudinem conformantem. Quare quod in aliorum nominibus more quorundam satirarum scriptorum sibi sumpsit, idem profecto non est quod miremur, si in suo ipsius nomine fecit aut ab aliis factum libenter tulit, praesertim quum tam leni et sponte se offerenti mutatione romanum et graecis barbare sonans nomen in gratum et pervulgatum graecum transformari posset. Haec habui quibus demonstrarem *Lycinum* nihil esse nisi graecis auribus accommodatum *Lucianum*.

*Hermotimus*, alter dialogi interlocutor, quis et qualis fuerit ut certo cognoscatur, praeter ipsum dialogum vix aliunde quidquam certi hauriri potest. In hoc igitur quae ad ingenium moresque Hermotimi cognoscendos spectant, undique collecta ita

proponam, ut inde appareat, quid de istiusmodi homine sit iudicandum aut quem certum hominem sub eius persona delitescere existimemus.

Inducitur Hermotimus vir sexagenarius (c. 17; 77) ex more illius temporis philosophorum barba prolixa et pallio detrito indutus (cf. c. 86). Is a quadragesimo aetatis anno per viginti continuos annos unis Stoicorum placitis (c. 13) et scholas frequentando et domi disputationum commentarios conscribillando ita se to tum dederat, ut pallidus et incurvatus alterum pedem iam in capulo habere videretur (c. 2; 78). Hanc autem vitae rationem se suscepisse ait, ut supra vulgum emineret et duce sapientiae magistro summam felicitatem in veritatis cognitione et in virtute positam consequeretur (c. 1.). In quo vitae genere, antequam hoc tam mirum consilium caperet, versatus sit, quibus artibus eruditus, quibus parentibus ortus, ex paucis admodum vestigiis per dialogum passim expressis conicere licet. Patris eius nomen fuit Menecrates, mater autem quomodo vocata sit Lycinus se fatetur ignorare (c. 50). Ingenuis eum institutum artibus fuisse ex egregia natandi peritia quae c. 65 praedicalatur qui velit colligat; sed clarius apparet ex eo quod saepius et multis locis solemnibus totius Graeciae certaminibus interfuerat. Et Olympiae quidem iuxta praesides certaminum, quo dilucidius quae ibi agebantur cerneret, eum sedentem invenimus (c. 39). Ex quo evidens est, eum neque ignobilem aut ineruditum hominem fuisse et a fortunis ita instructum, ut quo vellet peregrinari et in urbe ampliori vitam sumptuosam agere posset. Quin abiepto sapientiae studio, quamvis decrepitus senex esset, purpurea veste se exornaturum et quod vitae reliquum esset splendide peracturum iactat (c. 86). Ingenium vero quale in hoc homine fuerit cum ex vitae genere quod amplexus erat, tum ex tota eius cum Lycino disputandi ratione perspicuum fit. Quod licet iam quadragenarius vulgi tantum opinione et incerta fama confisus uni magistro Stoicae sectae ut omnium optimae se addixerat in eiusque verba etsi per viginti annos vana spe elusus iurare non desierat, haec una res satis declarat, quam parum recto et firmo iudicio usus sit (c. 18). Quamquam cum hac ingenii imbecillitate animi quaedam probitas et pietas coniuncta fuit, quae eum ad vitia gravissima magistri quem magno opere venerabatur caecum reddebat. Si vero quaerimus, quid in rerum humanarum cognitione tali duce profecerit, licet per viginti annos posterioris aetatis huic negotio tantum laboris et sudoris impenderit, ex tota eius disputationis ratione cognoscimus, quam multo inferior sit Lycino et viginti annis juniori necdum philosophiae initiatu (c. 13). Quae adversario opponit quaeque interrogat, interdum (c. 58) tam inepta sunt, ut Lycinus, postquam eum ex omnibus latibulis eiectum in angustias redegit, sibi temperare non possit, quin irrideat eum ludibrioque habeat; quare iste modo irascitur, modo contristatur, modo queritur, quod irrideatur (c. 51), quod vi illata invitus trahatur captiosisque rationibus irretiatur (c. 53; 58). Quin ita est obsecratus, ut adversarium acrius urgentem insimulet, quod sibi progressus quos iam in philosophia fecerit invideat (c. 63). Quamquam Lycinus pro certo affirmat se illum ut amicum humanissime tractasse atque argumenta alia et graviora ne laederet eum et profligaret retractasse

(c. 67). Ubi vero eo perductus est, ut nihil iam habeat quod obiciat, et se erroris turpissimi convictum sentiat, magnam profecto ingenii inconstantiam ostendit, cum non multum abesse dicit quin in lacrimas erumpat (c. 83); quas quum Lycinus viro tam grandaevo indignas reprobavit, prorsus diversam vitae viam se ingressurum vota facit et quoslibet philosophos sibi forte occurrentes ut canes rabiosos evitaturum se pollicetur (c. 86).

En habes imaginem qualemque Hermotimi Luciane! Utrum talis vir Luciani tempore vixerit eiusque consuetudine usus sit (c. 2), an alius quis sub hac persona lateat qui perstringatur, nunc quaerendum. Hominem tanta mentis infirmitate, ne dicam dementia, Luciani ingeniosissimi viri socium et familiarem per viginti annos fuisse, quis credat qui Lucianum norit? Quare in fictis rebus et personis nos versari nihil ambigendum et mirandum profecto est, a Fabricio (in bibl. gr. III, 564 ed. Harless) istum Hermotimum inter Stoicos philosophos nominari, qui potius inter discipulos sexagenarios qui viginti annis nihil in philosophia profecissent referendus erat. Ne nomine quidem obscuri cuiusdam philosophi dignus est, quod ei datur in encyclop. real. ed. Pauly s. v. Hermotimus. Quo iure igitur Lycinum et re et nomine ipsum Lucianum esse supra me demonstrasse confido, eodem Hermotimum mere fictam personam habendam esse censeo, et ita quidem, ut eius stultitia nonnunquam ultra poeticae veritatis modum aucta videatur, nisi quis illud tempus feracius fuisse putat stultissimorum hominum, quemque hodie vix quemquam reperias. Luciani autem proclivitatem vel ultra veri similitudinem depingendi ex uno exemplo quo nullum insignius mihi occurrit quodque instar multorum est cognoscas. Exstat illud in symposio c. 47, ubi Zenothemis altera manu nasum demorsum, altera oculum evulsum tenens perire se pae dolore clamitat. Nomen vero Lucianus personae partes vanae philosophiae agenti imposuit per se satis amplum simulque splendide sonaturum, quod etsi minus celebratum fuit per viros artibus aut litteris claros, quam alia cum nomine dei Mercurii copulata aut inde derivata nomina, a Luciano tamen tanti habetur, ut per hunc deum iurans non sine sale Hermotimi animum ad cognominem deum advertat (c. 13). Neque ignotus fuit Luciano Clazomenius ille philosophus Hermotimus, cuius anima corpore relicto peregrinata ipsum identidem suscitavit, ut refert muscae enc. 7. Sed quod Dodwellio (cf. Lehmann praef. p. 53) in mentem venerat, hanc animam agere in nostro Hermotimo, hoc nemo iam serio affirmabit. De qua animae traductione si Lucianus cogitasset, certe occasione data alludere non praetermisisset. Sed huic nostro Hermotimo cum illo Clazomenio non plus commercii est, quam cum altero naviculario, viro quodam iuvene qui in dialogis meretricum (4, 2) memoratur. Ex quo eiusdem nominis usu ad personas longe diversas denotandas, cuius exempla ubivis obvia sunt, hoc certe efficitur, ut Lucianus istius modi nomine non certum quandam hominem, sed aliquem quemque intelligi voluerit. Qua eadem ratione Aristophanem in nominibus nobilibus usurpandis usum esse docuit God. Hermannus ad Arist. Nubes praef. p. 42; not. ad v. 47; cf. Bernh. hist. litt.

Gr. II. p. 974 ed. 2dae. Neque in hac re cum Rankeo (cf. I. l. p. 28) facere possum, qui quibuslibet nominibus et personis in Hermotimo occurrentibus certos homines aequilibus notissimos denotatos esse censuit. Quid de aliis huius nostri dialogi personis sit iudicandum, suis locis videbimus, de Hermotimo nunc omnia ita in aperto esse credo, ut nemo non intelligat illum ita a Luciano fictum esse, ut profecto operae non sit pretium, talem hominem si revera vixisset resuscitare, neque verbum ullum de illo amplius facerem, nisi eidem Dodwellio l. l. statuere placuisse, Clazomenii Hermotimi animam peregrinantem non solum in hunc Hermotimum, sed per illum quasi in Marcum Aurelium imperatorem traductam, et ipsam vestem purpuream, qua conversus Hermotimus (c. 86) loco pallii philosophorum se usurum promittit, ad imperatoriam purpuram referendam esse. Habet quidem haec sententia quo se obiter intuenti commendet. Constat enim, M. Aurelium in omni vita philosophantem (cf. Capitol. in M. Aurel. c. 1) Stoicae sectae imprimis deditum fuisse et imperator quem esset magistrorum domicilia visitare non aspernatum esse (cf. Capit. 2, 3; Dio 71, 35; Eutrop. 8, 12). Sed quominus Hermotimum personatum imperatorem habeamus, non solum temporum discrepantia obstat, quam Lehmannus Dodwellio (l. l. p. 58) suo iure obiecit, sed omnia alia ab imperatore abhorrentia immo ita contraria sunt, ut illum non magis quam quosvis alios, quicunque nimiam operam philosophis dabant, Lucianus vellicare voluisse putandus sit (cf. Schlosseri hist. univ. t. III, 2, p. 236 sqq.).

Ceterum, si quem alium, se ipsum maxime in Hermotimo effingendo ob oculos habuisse Lucianum puto \*), quandoquidem relictta rhetorica anno aetatis quadragesimo (cf. bis acc. 32) veritatis inveniendae studio ductus ita animum ad philosophiam applicaverat, ut ad celeberrimos quosque sectarum magistros per orbem quasi circumiens neque sumtui neque operae parceret, donec tandem intelligeret, nec veritatem nec virtutem ne Stoicorum quidem ab hac parte laudatissimorum quemquam possidere, plurimos vero vanis promissis discipulos deludere et decipere (cf. pisc. 11; 12; 29; Necyom. 4 sqq.; Icaromen. 5. C. Fr. Herm. opusc. p. 208; 217 sqq.). Ita perspecta vanitate istius philosophiae sub persona Hermotimi quemcunque tales magistros sectantem inania agere ostendit, non quo sibi arrogaret, se solum veritatem perspexisse (cf. Hermot. 53), sed ut alios ad meliora agenda incitaret (c. 84).

\*) Simili modo Goethius in Faustii trag. part. I. in colloquio Mephistophilis cum discipulo se ipsum induxit. Cf. Dünzteri et Hartungii commentarios.

CAP. III.

*Quo tempore Hermotimus editus sit.*

Quod in nullo alio Luciani dialogo invenitur, ut auctor idemque primarum actor, quo anno aetatis dialogum habuerit, ipse dicat, hoc in Hermotimo (c. 13) factum videmus. Ibi enim Lycinus Hermotimo se virum quadraginta annorum aestimanti respondet tot annos se revera natum esse. Atque eundem numerum aetatis annorum reperimus in Bis accus. c. 32, ubi coram iudicibus ait sese annos fere quadraginta natum relicta rhetorica philosophiae operam dare coepisse. Qui loci quum in una eademque temporis professione congruant, eodem aetatis anno Lucianum tam Hermotimum edidisse quam vitae genus mutasse quotquot adhuc de Luciani vita libellorumque ordine et tempore sententiam aperte dixerunt, statuere non dubitarunt. Sed qui ipse antehac in unanimi tot gravissimorum virorum sententia acquieverim, nunc persuasum habeo, alterutrum eorum quae ex his locis colligi posse visa sunt necessario falsum esse, et quum maior fides alteri loco Bis accusati debeatur, Hermotimum a Luciano potius philosophiae iam perlaeso et cuiuslibet generis philosophos peroso quam philosophandi viam primum ingrediente scriptum fuisse.

Iam primum quid universe de annorum aetatis computatione in Hermotimo sit iudicandum, verba addita declarant, quibus numeri restringuntur. Sic Lucianus tam loco supra laudato c. 13 quam c. 2 et c. 25 particulam σχέδον addidit, cui c. 2 et c. 13 accedunt verba, εἰ γάρ τι μέμνημαι vel εἰ τι μέμνημαι. Ex quo colligere licebit, auctorem talia neque stricte neque serio dicta accipi voluisse. Sed haec parvi momenti sunt, gravius argumentum inde petam, quod quae c. 2 et c. 13 memorantur minime congruunt cum aliis Lucianeorum libellorum locis, ita ut alterutri necessario pro fictis habendi sint. Si enim Lycinus qui c. 13 quadragenarius inducitur, c. 2 iam per viginti continuos annos Hermotimum in eadem urbe scholas philosophorum frequentantem vidit, eundem necesse est et ipsum viginti annos eodem loco perpetuo mansisse. Ex quo consequens foret, ut Lucianus iam vicenarius uno eodemque loco sedem posuisset. Atqui ex Bis acc. c. 32 et Pisc. 29 evidenter apparet, illum non ante quadragesimum annum vitam rhetoris sive sophistae ubique gentium versantis reliquisse, praesertim quum ex altero loco (Pisc. 29), ubi se ad philosophiam configuisse ait, ut quidquid vitae sibi reliquum esset sub eius tutela transigeret, colligi possit, Lucianum potius quadragesimum annum iam egressum quam nondum quadragenarium vitae genus mutasse. Non potest igitur non fictum esse, quod c. 2 de viginti annis uno loco transactis narratur. Quodsi hic numerus fictus habendus est, idem eliam de aliis statuere aut saltem dubitare licet. Ut vero de numero eius loci, ex quo annum quo Hermotimus scriptus esset eruere voluerunt, non solum dubitarem, sed firmiter persuasum haberem illum non posse non fictum esse, aliae praeterea et graves

rationes me adduxerunt. Si enim ex locis supra allatis certo sequitur, Lucianum demum post annum quadragesimum philosophiae assiduam operam navasse, ea est huius dialogi ratio, ut eodem anno scriptus esse non possit, immo multa indicia longe seriorem annum natalem redarguunt. Primum enim tota dialogi materia testis est tantae notitiae quum ceterarum sectarum eorumque principum, tum in primis Stoicae philosophiae, quantum nemo nisi sit diu multumque in litteris et scholis illorum versatus, sibi comparare possit. Lucianum vero neque obiter neque extremis tantum labiis philosophiam delibasse, sed per complures certe annos assiduo studio in eam incubuisse, ubi primum attigit, ipsi serio loquenti et identidem affirmanti non est quod diffidamus. Cf. supra cap. II. extr. Exstant praeterea in hoc dialogo manifesta indicia ex quibus intelligitur, auctorem in fine longi temporis, quod philosophiae impendisse se dicit, constitutum fuisse. Sic et principium illud quod c. 47 commendatur et ars critica, quae c. 64 et c. 68 ad explorandos et eligendos optimos philosophos postulatur, fructus diuturni in philosophia collocati studii haberi possunt. Atque illa toties iterata querela de brevitate vitae si cum longa arte, quae hoc loco philosophia est, comparatur (cf. c. 1; 63), nonne argumento est, eum qui ita queritur experientia doctum et multa conatum eo pervenisse, ut etiam alios ab incepto deterreret, quod ipse tandem abiecturus est aut iam abiecit? Neque solum propter brevitatem vitae longam artem Hermotimo dissuadet, sed multo magis propter vanitatem cuiuslibet generis philosophiae, quando nullo studio certi aut firmi quidquam inveniri possit (cf. 69; 70; 71). Profecto haec sententia non cadit in hominem cum maxime in portum philosophiae confugientem et summa inde exspectantem, sed prodit animum de veritate invenienda desperantem omniaque in dubium vocantem. Quem animum Luciani quoniam ex Hermotimo cognoscimus, vix dubium relinquitur, quin finitis demum illis erroribus, quos veritatis inveniendae caussa susceperebat, Hermotimum scribere potuerit. Sed aliud argumentum in promptu est, quo quod statui magnopere confirmatur. Quod enim Lucianus c. 62 ipse dicit, a se alienum esse philosophiae maledicere, et quod c. 51 Hermotimum dicentem facit, ipsum cavillatorem esse et odisse philosophiam et irridere philosophos, hoc ipsum prodit, quo usque iam ultra querelas de perspecta vanitate philosophiae progressus fuerit, quamquam hic dialogus omnino a cavillatione alienor est quam quisquam eiusdem generis. Eum enim qui talia dicat potius osorem et irrisorem philosophiae et philosophorum quam amantem et sectatorem cogitare debemus. His argumentis ex interiori argumenti quasi recessu petitis aliquantum auxiliis accedit ex dialogi forma quam vocant sive compositione accuratius perspecta. Hic enim omnia tam enucleata, tam perspicua, tam ad persuadendum apta videmus, ut quum maturam aetatem auctoris tum ingenium optimis litteris praecipue antiquorum philosophorum (cf. Pisc. 6) imbutum et severa disciplina subactum facile cognoscamus. Atque ex eodem fonte fluxisse mihi videtur aequalitas illa prope singularis et orationis et disputationis per totum dialogum perfusa, quae non potest nisi ex animo tranquillo et moderato profecta haberi. Quare etiam vitiosissimi philosophiae magistri magis leniter et tacite perstringuntur, quam vehementer lae-

duntur uno excepto loco in fine dialogi (c. 86), ubi auctor qui admirabili animi moderatione indignationis affectum eo usque cohibuerit, parumper exardescit, cum philosophos istos cum canibus rabiosis comparat. Quo uno verbo quasi aculeum in animis legentium reliquit simillimum illi quem penultimus versus nubium Aristophanis continet (cf. God. Hermann ad h. 1.). Quamquam ipsa illa similitudo canum rabiosorum Luciano tam familiaris fuit, ut illo tempore minus acris et pungens quam nostro fuisse videatur. Sed satis multis et firmis argumentis meam sententiam de seniori aetate auctoris, qua Hermotimum conceperit, probasse et confirmasse credo; nunc a re non alienum erit quaerere, cur Lucianus in annis computandis a vero discesserit et quo tandem anno aetatis hunc nostrum dialogum scriptum, quoque loco inter ceteros ponendum esse existimemus.

Quo consilio Lucianus et Lycini aetatem i. e. suam vera minorem et Hermotimi maiorem finxerit, pro certo explorari nequit. Qui enim scire quisquam potest, quid quaque fictione scriptor, qualis Lucianus fuit, voluerit, cui certe haec venia danda est, ut personas ex suo arbitrio fingat, quo modo sese ei quod satirae propositum est optime consulturum arbitratur? Sed quoniam satirae hoc praecipuum est, ut ex oppositione rerum contrariarum risum excitet, non admodum a vero aberrare mihi videor, si ponam Lucianum hoc siccirco fecisse, ut quo magis discreparent aetas personarum contrarias partes agentium, eo luculentius cognosceretur, mature deserendam falsam philosophandi viam, ne quis sero erroris convictus aliis et deplorandus et ridendus appareret. Cuius rei ridiculum exemplum Lucianus Hermotimum proposuit, senem scilicet sexagenarium istis studiis deditum, qui a viri multo iuniori, sed recto iudicio utenti necessariis rationibus dedocetur et ad sanam mentem et meliorem vitae frugem revocatur.

Iam de anno quo Hermotimus scriptus sit siquaeritur, ingenue fateor, quoniam ex fictis huiusce dialogi numeris nihil colligere licet, ne aliud quidem vestigium me adhuc in hoc dialogo deprehendisse, quod ad tempus accuratius definiendum ducat. Quare hoc nobis satis esse debet, ut Hermotimum potius a quinquagenario Luciano quam a quadragenario scriptum esse statuamus, nisi forte ex commemoratione Evandridae, arbitri Olympiorum certaminum, quibus Hermotimus nuper (*ἐπαγγελος*) se interfuisse dicit (c. 39), annum illius Olympiadis ut eliciat alicui contingat. Quamquam nondum constat, utrum iste Evandridas idem sit qui Evanoridas, quem Pausanias (VI, 8, 1) catalogum victorum Olympiorum fecisse memorat, nec quo anno ipse ille Evanoridas vixerit. Cf. Pauly, encycl. real. s. v. Evanoridas.

Si vero ab aliis Luciani scriptis auxilium petimus, haec ad definiendum annum natalem Hermotimi nihil, pauca ad ordinem quo ponendus sit suppeditant, siquidem nullo testimonio uti licet quod ex libello vel uno nomine suspecto sit petitum. Quod quum plerisque qui de Luciani vita scriptisque ordinandis scripserunt, aliter visum esset, fieri non potuit, ut quibuscumque libellis qui Luciani nomine feruntur testibus usi multa incerta aut falsa in medium proferrent. Itaque adhuc fundamento caremus, quo Luciani vitae historiam et ordinem libellorum firmiter superstruere possimus. Si placuisset viro summo, Im. Bekkero, qui libros et genuinos et suppositios in novum ordinem redegit,

eum aliis communicare rationes, quibus ductus singula quaeque disposuerit, hinc fortasse certi quid in Hermotimum redundare potuit. Nunc nihil reliquum est, nisi ut Bekkeri ordine utpote maxime probabili pro fundamento habitu quo queratur, num Hermotimus inter ceteros Luciani libellos quo debeat loco ab illo sit positus. Atque Bekkerus Hermotimum post tam multa Luciani scripta posuit, ut paene credam ab illo hunc dialogum seniori quam vulgo putatur aetati auctoris attributum fuisse. Verum paucis dialogis, praecipue ex numero eorum, qui cognatione quadam inter se continentur, a Bekkerio post Hermotimum collocatis priorem locum concedendum esse perspexisse mihi videor. Sed quum probe sciam, quam ambigua et parum explorata in re verser et quantae auctoritatis viro oblocuturus sim, quo confidentius de aliis rebus iudicavi, eo timidius de hoc ordine invertendo sententiam meam pronuntiabo. Itaque praeter Anacharsin, Timonem et Menippum, qui et a dictione et a dialogi compositione minus maturum auctorem produnt, etiam Eunuchum et Fugitivos Hermotimum antecessisse puto, quibus dialogis ceteroquin minus perpolitis quam Lucianus certos quosdam sibi invisos homines mordaciter lacesciverit, iracundior ideoque iunior cum eos scribebat fuisse putandus est. Philopseuden vero minus dubitanter proxime ante Hermotimum collocaverim. Hoc enim dialogo iidem fere sectarum principes, qui nobis in Hermotimo et Symposium mutatis tantum nominibus occurrunt, propter credulitatem in rebus sensum et intellectum egredientibus perflicantur et deridentur; quod quoniam Lucianus sine ira et acerbitate fecit, ac dialogo tamquam primo impetu leniori philosophos cuiusvis generis adortus esse videtur, quem mox insecurus est Hermotimus. Quo licet magis rem ipsam i. e. vanum esse omne sectarum studium sale Attico et ironia Socratica ita demonstrasset, ut quosdam tantum philosophos tecte et tacite perficaret; tamen hoc dialogo edito istos philosophiae doctores exacerbasse et sibi invisos reddidisse videtur. Quod tantum absuit ut ab iis persequendis abstineret, ut non ita multo post acrioribus dialogis in eosdem invehernetur. Quorum primo loco ponendum duco Vitarum auctionem, cuius dialogi titulus quomodo cum altera inscriptione Hermotimi cohaereat, supra monui. Sicut autem Vitarum auctione odium suum in omnes omnino sectas effuderat, quando ne venerabilioribus quidem antiquitatis philosophis pepercera, ita magistrorum sapientiae et virtutis vicia turpissima in Symposium castigavit, quem dialogum vel propterea post Hermotimum ponendum esse pro certo habeo, quod omnia illa vicia, quae in Hermotimo carpiti et generaliter perstringuntur, in Symposium ad vivum adumbrata videmus. Si enim tum quam Hermotimum foras dabat Symposium in manibus legenium iam fuisset, neque opus neque aptum foret speciem affectare secreta continentis, ubicunque in Hermotimo ad philosophorum improbitatem sermo deflectitur.

CAP. IV.

*Quo loco dialogus sit habitus.*

Hoc mea perquisitione Hermotimi effectum est, ut quod alii ex Herm. c. 2. e simili loco Demonactis (c. 1) statim collegerunt, mihi nunc ex tenuibus vestigiis nostri dialogi sit eruendum. Etenim qui illis locis ut veris et indubitatis utuntur, hoc certo se scire arbitrantur, Lucianum qui relictam rhetorica Athenas migravit, ibidem per viginti annos, quod Planckio placuit (cf. progr. Uracense a. 1850 p. 9), aut saltem quinque ut statuit Struvius (cf. de vita Luciani spec. II.) domicilium perpetuo habuisse. Ex quo consequens esset, omnes Luciani libellos, quos quidem post quadragesimum aetatis annum editos esse constat, exceptis modo iis, qui extremam aetatem auctoris produnt, hoc ipso loco esse conscriptos. Quare supervacaneum foret anxie quaerere quo loco Hermotimus in lucem prodierit. Sed quoniam ex commenticiis Hermotimi numeris nihil concludere licet, Demonactis autem similiusque libellorum multis nominibus suspectorum testimoniis abstinendum est, dum isti libri si fieri possit ab omni suspicione sint liberati; omnia vestigia quae Hermotimo impressa sunt ita pervestigare meum esse duxi, ut etsi nomen aut certum quoddam indicium illius urbis in cuius via quadam totum colloquium absolvitur, nusquam reperitur, illam tamen non aliam nisi Athenas esse veri simillimum haberi possit. In ceteris dialogis qui perinde atque Hermotimus in sectis et magistris sapientiae persequendis et deridendis versantur ex uno alteroque indicio Athenis omnia velut in scena agi statim docemur. Sic et in Vitarum auct. c. 7, et in Bis accus. c. 4 uno Areopago commemorato et auctionem et iudicia Athenis haberi comperimus. Quin ut in Bis acc. c. 9 praeter Areopagum arx et Pelasgicum Athenas indicant, ita in Piscatore tot loca et monumenta Athenarum ut c. 13 Ceramicus, Academia, Poecile, et c. 42 Pelasgicum, Asclepieum, Anaceum et Tali sepulcrum memorantur, ut imaginem quasi illius urbis repraesentent. Talia quidem et his similia documenta in hoc nostro dialogo frustra investigabis, attamen non desunt alia eaque satis manifesta indicia quibus eodem ducimur; modo teneamus, Hormotimum cum iis quos modo dixi dialogis propinqua quadam cognatione esse coniunctum. Itaque equidem Asclepieum (quod Herm. c. 37 simul cum Bacchi templo memoratur, quamvis multa ubique tunc Aesculapii templa et oracula fuisse constet (cf. Luc. Alexand. c. 10; 13; 14 ibique Jacob), ad Athenas propterea referre non dubito, quod eiusdem etiam in Pisc. I. l. mentio facta est. Simile vestigium agnosco in mysteriis et Panathenaeis quae c. 4 annuorum solemnum exempla afferuntur. Quae si nusquam nisi Athenis celebrata fuisse certum est, quis negaverit eos qui his festis ad tempus aliquod constituendum utuntur, Athenienses aut in Atheniensium numerum receptos esse? Atqui mysteria apud Lucianum non alia nisi Eleusinia esse, quae Athenis et Eleusine quotannis celebabantur, prima harum observationum particula a. 1851 edita p. 6. ita me demonstrasse puto, ut inde colligere liceat, Panathenaea cum mysteriis hoc loco coniuncta ilidem Atheniensium solemnia habenda esse, quamquam Lucianus de merced.

cond. c. 37. Romanorum festum Minervae etiam Panathenaea nominavit. Cf. cap. II. pag. 9. Neque admodum levis momenti esse puto, quod ex Atheniensium historia exempla passim petuntur, ut Thesei c. 47, Phidiae c. 54, Euclidis archontis c. 76. Qua ex re etsi nondum consequitur, talia loquentem Athenis locutum esse, tamen ea pro Atheniensibus et ab homine rerum Atheniensium gnaro dicta habere licet.

Verum his missis quae sola et seorsum spectata levia et minus firma esse ipse non diffiteor, gravius argumentum ex philosophorum multitudine et conditione qualem in Hermotimo conspicimus, atque ex convivio apud Eucratem habitu subiungam. Hermotimum enim dum legimus, omnium quotquot tunc florebant sectarum duces cum suis quisque sectatoribus et discipulis nobis obviam veniunt. Cf. c. 14; 18; 48. Quin in propylaeo domicilii unius e nobilissimis doctoribus indicationem litteris maiusculis publicatam eoque maximum tam popularium quam exterorum discipulorum gregem concursantem videmus. Cf. c. 9; 10; 11; 80. In hac imagine nemo non agnoscit sedem illam et domicilium sapientiae studiorum, Athenas; quam urbem non solum ceteris illo tempore litterarum laude celebratis longe praestitissem, sed et ipsam Luciani tempore Hadriani et Marci Aurelii liberalitate et patrocinio tanta celebritate philosophiam docentium et dissentientium quanta nunquam antea aut postea floruisse constat. Cf. Luc. Eunuch. c. 3. Bernh. hist. litt. Graec. p. 488; 504; 510 sq. ed. 2. At dicat aliquis, haec eadem eodem aut maiore iure de Roma capitali urbe totius orbis terrarum praedicari posse. Concedendum quidem Romam praecipue tempore philosophantium imperatorum cuiuslibet generis philosophos cum ex aliis terris tum maxime e Graecia confluxisse gloriam et pecuniam quaerentes, ubi aut publice docerent aut in familiis nobilium et divitium mercede conducti operam praestarent. Cf. Luc. de merc. cond. Bernh. l. l. p. 484. Verum enimvero primum istiusmodi graeculorum multo maior numerus erat sophistarum seu rhetorum et grammaticorum quam eorum qui philosophiam profitebantur; (cf. Bernh. l. l. p. 488. et hist. litt. Rom. p. 51 sqq. ed. 2), tum ipsi illi licet totidem quo Athenis Romae fuissent, in ingenti hominum Romae degentium multitudine tam parva auctoritate erant, ut, quod Lucianus testatur de merc. cond. 24., Romae peregrini iisque ob mores despiciati et essent et haberentur. Cf. de merc. cond. c. 40. Athenis vero et urbe multo minori et antiqua sede philosophiae omnium maxime philosophi illa tempestate ita numero et auctoritate florebant, ut quin inde potius quam ab ulla alia urbe ne Roma quidem excepta imaginem in Hermotimo nobis oblatam Lucianus depromserit, minime sit dubitandum.

Sed ut ultimus scrupulus evellatur, si quis adhuc resideat, unum restat argumentum ex convivio et persona Eucratis ductum. Ante omnia autem Eucratis quis et qualis fuerit inquirendum erit, de quo interpres Luciani in diversa abierunt. Si scholiastae ad Gall. c. 7 hunc Eucratem Athenensem fuisse affirmanti fidem habere liceret, nullo alio argumento opus fuit ad demonstrandum, hunc nostrum dialogum Athenis habitum fuisse. Verum etsi scholiastae alias probabilia et ad res et loca Athenarum explicanda utilia assertunt, tamen qui haec de Eucrate prodidit, quem certum et notum hominem videtur habuisse, hoc siccirco ex nullo alio fonte quam ex Hermotimo aut ex suo ingenio cum hausisse equidem

puto, quod Eucratem qualem ex Hermotimo aliisque Luciani dialogis cognoscimus, eodem quo Hermotimum modo commenticum nomen esse personae divitis tam philosophantis quam cum philosophis convivantis mihi persuasum est. Si enim ex iis quae de Eucrate in Herm. c. 11, Gall. c. 7; 32, Philops. c. 5 sqq.; 17, traduntur, unam quandam imaginem animo concipimus, ita ad vivum expressum videmus hominem certis moribus praeditum, ut, quod Lucianus se voluisse dixit, ex more antiquae comoediae statim cuivis mutatis modo nominibus et una alterave nota detracta si non pares at similes interaequales et populares in mentem venirent. Cf. Pisc. 38; Ranke I. l. p. 29. Fingitur enim Eucrates vir sexagenarius divitiarum copia et usu liberali tam celeber, ut a Luciano non nominetur nisi addito epitheto ὁ πάντα vel ὁ πλούσιος. Eum cuiuslibet sectae philosophi non solum ad opulenta convivia concelebranda convenient, sed ab iisdem et ab ipso Luciano podagra laborans visitatur. Atque inter illos Eucrates et sapientiae laude (cf. Philops. c. 17) et barba prolixa ceteroque habitu philosophi insignis conspicitur; quod tamen non impedit, quominus idem vir etiam clandestinis libidinibus deditus fuisse dicatur. Cf. Gall. c. 32. Quae omnia etsi in unum hominem cadere possunt, tamen nemini in mentem veniet credere Lucianum verum istiusmodi hominem, quippe cuius familiaritate uteretur, despiciatui et risui dare voluisse; quodsi Eucrates qualis in Hermotimo, Philopseude, Gallo depingitur, veritati repugnat, nihil nisi fictum nomen esse etiam evidentius elucet e dialogis mortuorum, ubi (5, 1 init.) eodem nomine significatur homo exoletus nonaginta annorum, qui praeter divitias nihil cum hoc nostro commune habet, et praeterea a Luciano Sicyonius appellatur, quare Solanus Romanum cum quam Graecum habere maluit (cf. Solani not. ad h. l.). Quod vero in tam vario eiusdem nominis usu, cuius simile exemplum in Hermotimi nomine supra vidimus, opulentiae nota ubique servatur, facile adducor ut credam Lucianum non solum nomen, sed etiam divitias ab Aristophane', quem quomodo secutus sit ipse aperuit in Pisc. c. 25; 26; 33. assumpsisse, quem ut res flagitabat ex suo ingenio varie effingeret. Cf. Aristoph. Equit. v. 129; Lysistr. v. 102. Verum idem scriptor ut sibi indulxit idem nomen ad varias personas adhibere, ita easdem prope personas mutatis tantum nominibus inducere non dubitavit. Veluti convivator Symposii etsi Aristaenetus nominatus ab Eucrate Hermotimi, Galli et Philopseudis praeter nomen vix ulla alia re differt. Tam similia enim hic omnia velut in pictura arte elaborata conspicimus, quae Hermotimus et Gallus leviter tantum adumbrata continent. Inter convivas autem ut in Zenothemide Stoicae philosophiae doctore statim agnoscamus Hermotimi magistrum, quamvis eius nomen in hoc nostro dialogo consulto reticeatur, ita is qui in Symposio Peripatetici philosophi partes agit etsi ex Euthydemus Cleodemus factus eadem persona est, quam Hermotimus offert. Sed pauca haec exempla satis declarant, Eucratem neque certum quendam hominem esse, neque ex nomine eius quidquam colligere licere. Itaque mores et ingenium divitis illius viri, qui, sive Eucrates sive Aristaenetus vocatur, cuiusvis generis philosophos lautis epulis excipere et cum iis philosophari solebat, quo volumus nos ducere debent. Quamquam omnino negandum non est etiam Romae Eucratis similes exitisse viros nobiles et divites

qui philosophos aliosque litteratos homines ad coenas vocarent, tamen quum romani nobiles teste Luciano (cf. de merc. cond. c. 25; 35.) philosophiae parum studiosi essent, raro certe Romae tam frequens philosophorum concilium cerneret, quale apud Eucratam vel Aristaenetum videmus. Et profecto, si istiusmodi convivia Romae frequenter celebrata fuissent, Lucianus ea in dialogo de mercede conductis, qui totus in rebus romanae describendis versatur, silentio non praetermisisset. Ceterum hoc ultimum argumentum de patria Hermotimi, quod a philosophis et Eucrate petii, tam grave mihi videtur, ut etiamsi nulla alia extarent indicia, et *Philopseudis* et *Symposii* scenam Athenas esse audenter affirmarem.